



REPUBLIKA E SHQIPËRISË
KUVENDI

MIRATOHET

K R Y E T A R I

Gramoz RUÇI

REZOLUTË

**PËR VLERËSIMIN E VEPRIMTARISË SË KOMISIONERIT PËR TË DREJTËN
E INFORMIMIT DHE MBROJTJEN E TË DHËNAVE PERSONALE
PËR VITIN 2019**

Kuvendi i Shqipërisë:

- Duke vlerësuar rolin e veçantë të Zyrës së Komisionerit për të Drejtën e Informimit dhe Mbrojtjen e të Dhënave Personale (KDIMDP), si institucion i pavarur dhe përgjegjës për mbikëqyrjen dhe monitorimin e së drejtës së informimit dhe mbrojtjes së të dhënave personale, si dhe për nxitjen e standardeve më të larta në mbrojtjen dhe promovimin e të drejtave dhe lirive themelore të njeriut, që ka në thelb të fushës së veprimtarisë së tij;

- Duke njohur zhvillimin pozitiv që po merr ndërgjegjësimi i publikut në lidhje me të drejtën e informimit dhe mbrojtjen e të dhënave personale, si dhe duke inkurajuar e mbështetur këtë institucion në rritjen e ndërgjegjësimit të autoriteteve publike dhe kontrolluesve publikë e privatë për detyrimet e tyre mbi transparencën dhe llogaridhënien, në kuadër të së drejtës për informim, por edhe ruajtjes së jetës private, si dhe duke mbështetur e nxitur bashkëpunimin me këtë institucion, si dhe bashkëpunimin e tij me institucionet e tjera në nivel kombëtar e ndërkombëtar;

- Duke vlerësuar rolin e këtij institucioni në arenën ndërkombëtare dhe duke vlerësuar, në këtë aspekt, zgjedhjen e Zyrës së Komisionerit në cilësinë e anëtarit të Komitetit Ekzekutiv të Konferencës Ndërkombëtare të Komisionerëve për Mbrojtjen e të Dhënave Personale dhe të Privatësisë ICDPPC, si dhe konfirmimin e tij si anëtar vëzhgues në Bordin Europian të Mbrojtjes së të Dhënave Personale, në formatin e tij të ri si organ vendimmarrës i Bashkimit Europian, në kuadër të Rregullores 2016/679 të Përgjithshme të Mbrojtjes së të Dhënave të BE-së (GDPR);

Kuvendi i Shqipërisë shqyrtoi veprimtarinë e Komisionerit për të Drejtën e Informimit dhe Mbrojtjen e të Dhënave Personale për vitin 2018 dhe konstaton se:

- Veprimtaria e Komisionerit, ka shënuar përmirësim të ndjeshëm në zbatimin e ligjit nr. 119/2014 “Për të drejtën e informimit”; ligjin nr. 9887, datë 10.3.2008, “Për mbrojtjen e të dhënave personale”, të ndryshuar.

- Në kuadër të së drejtës për informim, ka vijuar punën për përmirësimin e procedurave për shqyrtimin e ankesave, si dhe nxitjen e autoriteteve publike për të vënë në dispozicion të publikut informacion pa kërkesë.

- Niveli i transparencës në institucionet qendrore dhe në njësitë e vetëqeverisjes vendore është përmirësuar në krahasim me vitin 2017.

- Është miratuar programi “Model i transparencës për njësitë e vetëqeverisjes vendore”, i cili do të vihet në zbatim gjatë vitit në vazhdim nga organet e vetëqeverisjes vendore.

- Objekti i ankesave të adresuara pranë Zyrës së Komisionerit lidhet kryesisht me:

Cenimin e të drejtave të subjekteve të të dhënave personale (e drejta për akses, si një e drejtë e rëndësishme e subjektit të të dhënave, që lejon këtë të fundit të marrë informacion nga kontrolluesi lidhur me përpunimin e të dhënave të tij); përhapjen/transmetimin e të dhënave personale pa pëlqimin e subjektit të të dhënave personale, si dhe në persona të paautorizuar, për të mbrojtur të dhënat personale; përpunimi i të dhënave në mënyrë jo të drejtë dhe të ligjshme (përhapja në mediat dhe portalet *online*); vendosjes së kamerave në ambiente publike dhe private; marketingut të drejtpërdrejtë në lidhje me komunikimet e pakërkuara, nëpërmjet telefonit ose postës elektronike; tejkalimi i afatit të mbledhjes së të dhënave personale për një qëllim të caktuar.

- Numri i hetimeve proaktive me iniciativë është rritur lidhur me procesin e mbledhjes dhe përpunimit të të dhënave personale të qytetarëve nga kompanitë e mëdha publike dhe private.

- Është monitoruar zbatimi i rekomandimeve të dhëna nga Komisioneri, si dhe janë ndërmarrë hetime administrative në kuadër të verifikimeve të zbatimit të tyre.

- Është angazhuar në monitorimin e përpunimit të të dhënave personale dhe mbikëqyrjen e respektimit të masave të sigurisë gjatë përpunimit të tyre, nga kontrollues publik dhe privatë;

- Ka adresuar rekomandime pas çdo kontrolli të ushtruar në kontrollues dhe përpunues të ndryshëm publikë dhe privatë.

- Vazhdon të jetë e ulët ndjeshmëria dhe angazhimi i qytetar, lidhur me zbatimin e ligjit nr. 146/2014 “Për njoftimin dhe konsultimin publik”. Gjatë vitit 2018 janë trajtuar vetëm 3 ankesa, në të cilat ankuesit kanë pretenduar në moskonsultimin e projektakteve me publikun.

- Në zbatim të VKM nr.145, datë 13.3.2018, “Për krijimin e bazës së të dhënave shtetërore “Regjistri elektronik i kërkesave dhe i përgjigjeve për të drejtën e informimit””, konstatohet se ky regjistër është instaluar në 27 autoritete publike, duke u shoqëruar me trajnime për koordinatorët dhe stafin IT të këtyre institucioneve.

- Është organizuar edicioni i 28-të i Konferencës së Autoriteteve Europiane të Mbrojtjes së të Dhënave, i cili u zhvillua për herë të parë në Shqipëri, ku morën pjesë rreth 100 përfaqësues të 62 autoriteteve europiane të mbrojtjes së të dhënave.

- Është angazhuar në bashkëpunimin ndër-institucional dhe ka luajtur rol proaktiv në kuadër të implementimit të akteve kombëtare dhe ndërkombëtare në fushën e mbrojtjes së të dhënave.

- Ka dhënë mendime për projektligje dhe akte nënligjore, në rastet e kërkuara, me synim harmonizimin e legjislacionit të brendshëm me ligjin për mbrojtjen e të dhënave personale.

- Ka tendencë në rritje në lidhje me numrin e hetimeve pranë kontrolluesve të ndryshëm me sensibilitet, në kuadër të mbrojtjes së të dhënave personale si: institucione financiare,

mbledhjes së borxhit, telekomunikacion, media *online* etj. Gjithashtu, vlejné të përmenden hetimet administrative të ndërmarra pranë disa ministrive.

- Është angazhuar në organizimin e aktiviteteve informuese dhe ndërgjegjësuere për respektimin e së drejtës për informim dhe mbrojtjes së të dhënave personale. Aktivitetet janë fokusuar kryesisht në sistemin arsimor, duke përfshirë nxënës dhe mësues të shkollave 9-vjeçare dhe të mesme, studentë dhe staf akademik, koordinatorë të së drejtës për informim, shoqërinë civile, median, kontrollues publikë dhe privatë në sektorin shëndetësor, si dhe sektorin bankar.

- Ka zhvilluar trajnime të ndryshme me objekt të drejtën për informim dhe mbrojtjen e të dhënave personale, por vihet re se kategori të caktuara të autoriteteve publike nevojiten të përfshihen në trajnimet e planifikuara në të ardhmen, ku veçojmë gjykatat, bashkitë dhe shoqëritë shtetërore.

Kuvendi i Shqipërisë kërkon që Zyra e Komisionerit, për vitin 2019, në përmbushje të detyrave të ngarkuara me ligj, të angazhohet veçanërisht dhe në këto drejtime:

- Të thellojë mbikëqyrjen dhe monitorimin e zbatimit të ligjit nr. 119/2014 “Për të drejtën e informimit”, mbi planin tematik, duke synuar rritjen e kontrollit mbi veprimtarinë e administratës publike, për garantimin e të drejtave të qytetarëve dhe aksesin në informacion;

- Të monitorojë përditësimin e programeve të transparencës dhe regjistrit të kërkesave dhe përgjigjeve, nga autoritetet publike, me fokus të veçantë ministritë dhe organet e pushtetit vendor;

- Të investohet për zhvillimin dhe mirëmbajtjen e mëtejshme të regjistrit elektronik të kërkesave dhe përgjigjeve për të drejtën e informimit, që administrohet nga autoritetet publike.

- Të zhvillohet mbi plan tematik procesi i monitorimit dhe mbikëqyrjes së zbatimit të ligjit nr. 9887, datë 10.3.2008, “Për mbrojtjen e të dhënave personale”, duke synuar minimizimin e shkeljeve të ligjit, respektimin e privatësisë dhe përpunimin e drejtë e të ligjshëm të të dhënave personale;

- Të mbikëqyrë kontrolluesit publikë dhe privatë mbi zbatimin e detyrimit për informim të subjekteve të të dhënave, në lidhje me të drejtat e tyre, qëllimin e përpunimit, publikimin e politikave të privatësisë në faqet e tyre *online*;

- Të rrisë numrin e masave administrative për shkelje ligjore të konstatuara, me fokus të veçantë mungesën e programeve të transparencës dhe regjistrit të kërkesave dhe përgjigjeve;

- Të përfshihet për të pasur rol aktiv në rregullimin e veprimtarisë së medias *online*, duke siguruar informacion publik proaktiv nga autoritetet publike, në respekt dhe garantim të parimeve dhe legjislacionit për privatësinë;

- Të forcojë marrëdhëniet bashkëpunuese me partnerët ndërkombëtarë, në përmbushje të angazhimeve të marra në kuadër të projekteve të përbashkëta, të cilat synojnë përmirësimin e dy fushave të veprimtarisë së institucionit dhe organizimin e trajnimeve;

- Të vijojë të luajë rol aktiv në favor të proceseve integrale të vendit, në përmbushje të funksionit të anëtarit të Komitetit Ekzekutiv të Konferencës Ndërkombëtare të Komisionerëve për Mbrojtjen e të Dhënave Personale dhe të Privatësisë ICDPPC, si dhe atij të vëzhguesit në Bordin Europian të Mbrojtjes së të Dhënave Personale;

- Të asistojë në hartimin e kuadrit të nevojshëm ligjor dhe nënligjor, me qëllim përafrimin e legjislacionit shqiptar në fushën e mbrojtjes së të dhënave personale me legjislacionin përkatës të BE-së, konkretisht me Rregulloren (BE) 2016/679 të Parlamentit Europian dhe të Këshillit, të datës 27 prill 2016 (Rregullorja e Përgjithshme për Mbrojtjen e të Dhënave Personale) dhe Direktivën (BE) 2016/680 të Parlamentit Europian dhe të

Këshillit, të datës 27 prill 2016 (Direktiva për mbrojtjen e të dhënave të personave fizikë gjatë procesit penal);

- Të intensifikojë dhe të nxisë punën në përmbushjen e plotë të detyrimeve ndërkombëtare mbi ratifikimin dhe nënshkrimin e Protokollit Shtesë të Konventës 108+ “Për mbrojtjen e individëve nga përpunimi automatik i të dhënave personale”;

- Të vijojë aktivitetet informuese e sensibilizuese mbi edukimin e të rinjve për të drejtat dhe përgjegjësitë e përdorimit të të dhënave personale në ambientet digjitale.

Miratuar në datën 28.3.2019